

許州志八



DS  
793  
H52H835  
1838  
V.8







許州志卷之八

直隸許州知州高安蕭元吉纂修

人物中

仕達

長厚

風節

文苑

仕達

東漢荀彧字文若潁川人朗陵令淑之孫也少有才  
名南陽何顓名知人見彧而異之曰王佐才也舉  
孝廉再遷亢父令董卓之亂棄官歸鄉里北至冀  
州袁紹待以上賓之禮聞曹操有雄畧度紹不能  
定大業乃去紹從操操悅曰吾子房也以爲奮武



司馬建安元年獻帝還洛陽操奉迎車駕徙都於許以彧爲侍中守尙書令操每征伐軍國之事皆與彧籌焉袁紹收河朔有驕氣與操書甚倨操謀於彧彧以奇兵破紹封萬歲亭侯十七年董昭等欲進操爵國公九錫備物密以訪彧彧曰曹公本興義兵匡振漢朝雖勲庸崇著猶秉忠貞之節君子愛人以德不宜如此事遂寢操心不能平會南征孫權因表畱彧遂以彧爲侍中光祿大夫持節參丞相事至濡須彧病畱壽春操餽之食發視空



器也於是飲藥而卒時年五十帝哀惜之爲之廢  
燕樂諡曰敬侯明年曹遂稱魏公云  
李敏五大夫將軍  
李謨字道謀臨淮太守  
李叟字子讓上黨太守  
李護字鴻默酒泉太守  
李武字昭先東郡太守太常卿  
李修字伯游後漢太尉虛懷樂善保全涼州功尤  
大初嘗受業壽張侯樊儵



李諒字世益趙國相諒弟叔叔弟訓訓弟季四人皆爲牧守有四龍之號

三國魏荀攸字公達彧從子也祖父曇廣陵太守攸少孤及曇卒故吏張權求守曇墓攸年十三疑之謂叔父衢曰此吏有非常之色殆將有姦衢悟乃推問果殺人亡命由是異之何進徵拜黃門侍郎董卓徙長安攸與何顒等謀殺之事覺攸繫獄攸言笑自若會卓死得免曹操迎天子徵攸爲汝南太守與語大悅曰公達非常人也以爲軍師曰攸



自初佐臣無征不從前後克敵皆攸之謀也封陵  
樹亭侯攸曾病世子問病獨拜床下其見尊異如  
此長子緝有攸風黃初中紹封攸孫彪爲陵樹亭  
侯邑三百戶

鍾繇字元常皓之曾孫嘗築臺學書漢末舉孝廉  
除尙書郎楊陵以疾去避三府爲廷尉正黃門侍  
郎漢帝在西京李傕郭汜亂長安繇說傕汜等厚  
加報答由是曹操使命遂得通已而傕脅天子繇  
策謀天子得出長安繇有力焉曹丕踐祚遷太尉



丕罷朝謂左右曰鍾公一代偉人後世殆難繼矣  
明帝卽位遷太傅卒諡成侯

陳羣字長文潁川許昌人紀子實孫羣爲兒時實  
可之常語人曰此兒必興吾宗及長仕漢爲治書  
侍御史入魏擢御史中丞時曹操議復肉刑令曰  
安得通理君子達於古今者使平斯事乎昔陳鵠  
臚以爲死刑有可加於仁恩者正謂此也御史中  
丞能申其父之論乎羣反覆極言肉刑之當復曹  
操深善羣言以軍事未罷故且寢羣後轉爲侍中



領丞相東西曹掾在朝無適莫雅仗名義不以非道假人曹不在東宮深敬器焉及卽王位封昌武亭侯徙爲尙書制九品官人之法及踐祚遷尙書僕射拜鎮軍大將軍領中護軍錄尙書事明帝立封潁陰侯諡曰靖侯子泰嗣

荀勗字公曾爽之曾孫也自中書遷尙書令意甚怏怏或往賀勗曰奪我鳳凰池安足賀耶嘗在帝坐進飯顧左右曰此是勞薪所炊咸未之信帝遣問膳夫云實用故車腳衆服其明識卒贈司徒諡



曰成子十人俱有顯名

李瓚膺子東平相初曹操微時瓚異其才謂子宜等曰時將亂矣天下英雄無過曹公張卓與吾善袁本初汝外戚雖爾勿依必歸曹氏諸子從之并免於亂世

周崔彥穆字穆清河東武城人也曾祖顓魏平東府諮議祖蔚遭從兄司徒浩之難南奔江左仕宋爲給事黃門侍郎延興初復歸於魏拜潁川郡守因家焉父稚篤志經史不以世事嬰心起家秘書郎



隋開皇初以獻后外曾祖追贈上開府儀同三司  
新州刺史彥穆幼明悟神彩卓然年十五伏膺儒  
業爲時輩所稱魏吏部尙書隴西李神儁有知人  
之鑒見而歎曰王佐才也永安末除司徒府參軍  
事轉記室遷大司馬從事中郎魏孝武西遷彥穆  
時不得從大統三年乃與兄彥珍於成皐舉義因  
共攻拔滎陽擒東魏郡守蘇淑仍與鄉郡王元洪  
威攻潁川斬其刺史李景道孝武嘉之拜鎮東將  
軍金紫光祿大夫滎陽郡守四年兼行右民郎中



潁川邑中正賜爵千乘縣侯十四年加使持節車  
騎大將軍儀同三司散騎常侍司農卿時軍國草  
創衆務殷繁太祖乃詔彥穆入幕府兼掌文翰及  
于謹伐江陵彥穆以本官從平之世宗初進驃騎  
大將軍開府儀同三司俄拜總管十一州諸軍事  
安州刺史入爲御正中大夫陳氏請敦隣好詔彥  
穆使焉彥穆風韻間曠器度方雅善元言解談謔  
甚爲江陵所稱轉民部中大夫進爵爲公子君綽  
性夷簡博覽經史有父風大象末丞相府賓曹叅



軍君綽弟君肅解巾爲道王侍讀大象末潁川

郡守

張琳許州人唐末官眉州刺史修堰溉田民被其惠歌曰前有章仇後張公疏決水利秔稻豐南陽杜詩不可同何不用之代天工入蜀卒節度使

唐陳南仲潁川人貞元十八年爲武功丞邑人宜之號爲簡靖

後周韓褒字宏業潁川潁陽人少有志尙好學而不守章句及長涉獵經史深沉有遠畧屬魏室喪亂避地夏州時周文爲刺史素聞其名待以客禮及



賀拔岳爲侯莫陳悅所害諸將遣使迎周文周文問以去就之故褒曰此天授也何可疑乎周文納焉徵拜丞相府司馬進爵爲侯出爲北雍州刺史州北山多有盜賊褒密訪之竝豪右所爲也設法勘之一無差異竝原其罪許以自新由是羣盜屏息入爲給事黃門侍郎遷侍中除都督西涼州刺史廢帝元年爲會州刺史後以驃騎大將軍開府儀同三司進爵爲公累遷汾州刺史先是齊寇數入人廢耕桑前後刺史莫能防扞褒至適會寇來



乃不下屬縣人旣不備以故多被抄掠齊人喜於  
不覺以爲州先未集兵今還必不能追躡由是益  
懈不爲營壘褒已先勒精銳伏北山中分據險阻  
邀其歸路乘其衆怠縱伏擊之盡覆其衆故事獲  
生口者竝送京師褒因是奏曰所獲賊衆不足爲  
多俘而辱之但益其忿耳請一切放還以德報怨  
有詔許焉自此抄兵頗息遷河州總管乃轉鳳州  
刺史尋以年老請致事詔許之天和五年拜少保  
卒贈涇岐燕三州刺史諡曰貞子繼伯嗣仕隋位



終衛尉少卿

宋韓宗道字持正祖忠憲公億父贈太尉公綜孝友  
慈祥自少無子弟之過其遇人豁然不立畦畛其  
爲吏廉平無私所至勤勞公家雖貴且老未嘗怠  
以止其爲近侍中立不倚不事浮誇雖有忮心者  
莫之忌亦莫得而侮初以忠憲公恩補將作監主  
簿三遷大理評事監潁川商稅務會汝闕縣令號  
多職田前攝事者垂得租入而州俾公代公辭不  
得則過職田期而后往代時公年尙少衆伏其廉



嘉祐四年中進士第知越州餘姚縣公仕潁已有  
能聲至是摘姦撫字治行益白歷監在京皮角庫  
簽書彰德軍節度判官事歲饑請發官倉貸貧民  
民賴以濟熙寧初知巴州擢成都府路轉運判官  
兼管勾常平農田水利差役事講議法制必究利  
病凡所損蜀人不知其擾入爲開封府判官復出  
提點河北西路刑獄徙淮南路轉運副使兼提舉  
常平市易事入遷至尙書工部郎中旋徙知廬州  
歷知鳳翔府潞州官制行召爲尙書戶部郎中使



契丹還歷太常太僕少卿尙書左司郎中太府卿  
元祐三年擢權戶部侍郎均節食貨號爲稱職真  
拜刑部侍郎未幾復爲戶部以寶文閣待制權知  
開封府聽決平恕不事苛察歲餘復還戶部五遷  
大中大夫紹聖初除寶文閣直學士知成都府以  
喪子辭求便郡廼以待制知陳州徙青州兼京東  
東路安撫使又徙瀛州兼高陽關路安撫使又徙  
杭州卒塋長社縣嘉禾鄉耐忠憲公兆有文集廿  
卷藏於家



韓宗厚字敦夫潁昌府長社人祖忠憲公億父贈  
右光祿大夫緯以蔭補太廟齋郎初任徐州沛縣  
主簿秩滿授江寧府上元縣主簿大興水利漑汚  
萊爲良田者至二千七百餘頃創爲堰閘視時水  
旱而均節之民獲其利歌咏載涂丞相王文公爲  
守上其狀於朝以勞應格特轉光祿寺丞文公知  
其才事多委公以辦治稱知溫州永嘉縣簽書天  
平軍節度判官廳公事河決曹村口水暴至城下  
危在漏刻建議浚古黃河故道以殺其勢太守而



下畏避不決公請獨任其事水一夕而涸郡民樂在父爲人毆傷在往報之更廿五日而卒獄具當抵死公曰父被困辱而爲此情有可矜太守嘉其議爲讞於朝得減死論孫宗者以忿殺人吏鬻其獄罪止於杖公摘發奸狀卒致於法歲饑詔貸常平種錢有司并給仕宦之家以爲非朝廷惠養困窮之意不當濫及遂止簽書鎮安軍節度判官廳公事時有劇賊未獲捕者利重賞執小盜以告因交通獄吏鍛鍊成罪公臨訊立辨其誣爲正其獄



後竟獲眞盜一郡稱爲神明京畿積水爲害議者  
欲隨勢疏決自陳達於蔡河公曰陳地卑下歲苦  
流潦今又并受衆水是使鄰境爲壑民必受弊事  
寢不行自光祿寺丞四遷至承議郎賜六品服紹  
興元年卒年五十三塋潁川長社縣嘉禾鄉先兆  
之次有文集若干卷藏於家

韓絳字子華綜弟舉進士通判陳州歷遷江南安  
撫使行便民事數十條熙寧初韓琦薦其公輔器  
拜樞密副使轉參知政事會夏人犯塞絳請行邊



卽軍中拜中書平章事哲宗時封康國公卒贈太

傅諡獻肅所著有南陽集子宗師集賢殿修撰

按絳

維俱家許今其墓在州西靈井子孫俱附葬

韓維字持國絳弟以父輔政不就試宰相薦其好

古嗜學神宗時累官龍圖閣直學士知開封府王

安石惡其言保甲事出知許州尋召爲學士承旨

天久不雨維言當自責求直言帝卽命維草詔且

權罷保甲人情大悅是日乃雨元祐更役法命維

詳定時四方多上書稱便拜門下侍郎忌者讒之



出知汝州坐黨籍納官里居卒年八十二徽宗初  
追復其官維南陽集采入四庫

鄭文寶字仲賢襄城人南唐右千牛衛大將軍彥  
華之子以蔭授奉禮校書二郎煜歸朝不忘舊恩  
欲一見衛者難之乃被蓑笠冒爲漁者以見煜以  
爲忠後登太平興國進士除修武再遷光祿丞獻  
文召試改著作佐郎通判潁州拜殿中丞使川陝  
均稅次渝涪聞夔州廣武卒謀亂以計平之遷陝  
西運副許便宜從事歲凶誘豪民出粟活饑民八



萬餘口會秦隴賊趙包聚徒數千將趨劍閣附李  
順文寶移書蜀郡分兵討襲殲焉前後自環慶部  
糧越瀚海入靈武者十二次曉達蕃情習其語言  
經由部落每宿酋長帳中往往以父母呼之有龍  
猛卒戍環慶七年不得代思歸謀亂文寶矯詔以  
庫金給將士自劾請償詔免之以擅減解鹽價貶  
藍山令咸平中召還授殿中丞掌荆南榷貨務會  
慶州發卒護芻糧詣靈州文寶策其必敗未幾果  
爲繼遷所襲遽召文寶問計因獻河西隴右圖叙



其地利本末且言靈州可棄狀時方遣大將王超  
援靈武卽復文寶工部員外郎隨軍運甫至環或  
言靈州已陷文寶乃易服單騎間道抵清遠盡得  
其實遂奏班師就除本路轉運使上疏請再葺清  
遠軍王漢忠以爲生事遂徙河東又上言乞徙置  
管內廣銳兵萬餘於近南諸州就糧宰相李沆等  
言其非便乃罷之繼遷圍麟州令文寶乘傳晨夜  
赴之圍解遷刑部員外郎錫金紫頃之寇準薦其  
熟於西事可備驅策復任陝西轉運三年召還晚



年病發以其子鄆州推官於陵爲大理寺丞移知襄城以便養文寶能爲詩善篆書工鼓琴有集二十卷撰談苑二十卷江表志三卷

元謝讓字仲和潁昌人也祖義有才勇金貞祐間爲軍千戶讓幼穎悟好學及壯推擇爲吏補宣慰司令史調河間等路都轉運鹽司經歷終侍御史贈河南參知政事追封陳畱郡公諡憲穆

明吳謙字冲虛博物洽聞稱文章第一流中洪武甲子解元登戊辰進士初授行人轉山東兵巡道陞



山西按察使所至有治聲居鄉敦厲名節鄉人歎之入鄉賢祠

吳孔彰臨潁人有才識通經史值元季不仕至明初以儒起家累官至山西布政使

世家寶襄城人本姓李初仕元爲大學士賜姓世後歸明仕刑部尙書

張春字景初材畧淵宏洪武中以胄子擢刑部郎中尋陞都察院左僉都御史出調福建浙江兩省參政永樂中入爲戶部右侍郎終山西右布政使



劉理字希文臨潁人醇厚有器量自幼嗜學此入仕才名著稱官至湖廣布政使

許廓字文超襄城人魁偉倜儻博涉經史善草書  
洪武末鄉舉歷仕工科給事中勵志勤慎累遷工  
部右侍郎出撫鄉邦流民歸者凡數萬戶賜勅獎  
勞官至兵部尙書諡武英

王魯洪武間貢士初任山陽令轉永寧州知州尋  
陞刑部郎中以親老請告疏再上乃得歸半刺不  
投公府當道拜訪閉戶謝之宦遊鄉居到處祠祀



焉

王塤中天順癸未會魁歷任陝西臬司僉憲明斷  
平允三秦口碑至今嘖嘖尋劇疾再請懸車及歸  
尤譽重里閭祀秦名宦並入鄉賢

呂璋字廷玉中成化戊子經魁登戊戌進士授行  
人封王朝鮮陞監察御史歷巡山東陝西廣東三  
省白河抽分却金三千有奇士民德之陞雲南副  
使轉浙江學憲致仕著書修志歲祲賑饑功活萬  
人閭里有干犯者付之不校以覃恩進階三品諸



地有祠許亦尸而祝焉

賈詠字鳴和臨潁人宏治己酉鄉試第一丙辰進士改翰林院庶吉士授編修嘗兩爲會試考官所取士最稱得人正德初逆瑾竊政調兵部武選司主事及瑾誅累遷左春坊左中允國子監祭酒嚴立章程監事振舉拜禮部左侍郎嘉靖癸未晉尙書召入內閣參預機務再加少保兼太子太保武英殿大學士因事納忠從容啟沃世宗親製詩褒諭後致仕歸年躋八旬特降璽書存問卒謚文靖



所著有南塢集

高崧襄城進士都察院僉都會爲福建僉事初至高崧會汀漳盜起時炎夏瘴方盛同官皆憚行公奮然曰事不辭難臣之節也何懼爲遂往平之赴京過高郵湖值惡風公焚香告曰吾生平有欺心事或舟中有非義財當舉家溺不然何怖我耶言訖風息嘗任兵備兼視銀礦因革羨餘弊爲同事者忌以不飭論人寃之未幾陞按察司凡屬官不少假借焉宏治四年貴州苗梗化公以都院僉都勅



往撫之送者數千人皆泣曰高父去何日再來耶  
至貴未幾卒上遣官諭祭公居官三十餘年家貧  
如故二子瓌璿皆舉人賢而有文世其家

王翊字潤夫許州人弱冠雅擅時名郡守邵文莊  
公稱爲偉器中宏治己卯科亞魁正德戊辰授直  
隸安平令爲政先禮教重農桑會逆瑾擅權執法  
不阿流賊突起攻城死守數日卒保一城當道以  
保障奏聞上錫金帛旌其能擢德州知州去之日  
邑人建祠尸祝之時山東鎮守畢太監需索無厭



翊力抗之張千戶轅轍小民翊數其罪而杖之民  
賴以安轉松江同知剖決疑獄稱神明焉復除四  
川保寧同知創錦屏書院作興士類先後以科名  
顯者甚衆有文翁化蜀之風及卒崆峒李夢陽誌  
其墓識者以爲惟郭有道始無愧中郎筆矣則翊  
之人品可知

李欖字仲材許州人幼以孝聞嘉靖丙辰進士歷  
任平陽府知府初授刑部主事居官清謹用法寬  
平有奄宦與人構訟主者畏避遷就轉相推諉數



年獄不具株連無辜甚衆櫝廉其實不避權貴竟伸法紀賴以安全者數十家出爲平陽太守時平陽大祲設法賑濟全活饑民數萬人指揮張世朝與骨頭三骨頭四謀反率衆賊夜攻櫝督領鄉民親冒矢石身被數傷手刃一人五日內獲賊數百地方以靖撫按上其事奉旨當時決機非素有定見者不能臨陣効死非素得民心者不能賜金帛旌其能其他理彫敝抑強禦厚學校重農桑開墾山田疏通河道善政多端及致仕囊橐蕭然子孫



世其書香

魏廷萱校第六子成進士初授戶曹主政陞西安  
太守尋陞三楚臬憲三地皆有政聲仲子澧鄉薦  
經元迨會試報捷萱曰我昔在揚州與西安往往  
却金不受有子如此可爲清白吏報矣其詩曰佩  
印蒙恩逾六年應民瘁色染紅烟於今有子聞詩  
禮豈負當年不愛錢因忤時相請告後累徵不起  
盧輔元之子也諸生時閉戶攻苦爲州大夫所矜  
重思一見而不可得稱爲祥麟威鳳弱冠中壬午



經魁登嘉靖己丑進士陞戶部主政轉員外郎清  
操特著尋歸林下卒入祀鄉賢子際可中經魁修  
可成進士科第奕世

魏澧廷萱子校之孫也登進士初任濬縣令午堂  
夢鐵佛寺伽藍云亟詣寺救李舉人醒趨寺閭如  
也抵伽藍坐婉然夢中覩者俄風吹壁上軸起有  
隘牖一生一婦在焉訊之婦曰若生誤至此僧忌  
而思中傷之緩則岌岌矣旋率役搜捕婦鬻娼僧  
讞大辟生得釋後登賢書寺改東察院百姓歌曰



許州魏青天鐵佛寺改察院修西門外橋掘地得碑鐫有字云魏公橋其神異往往如此行取授御史未至任而卒

盧懋德際可之子也少時嘗值母病沈疴不起懋德痛泣焚禱願以身代母疾遂瘳督學李旌以孝格穹蒼及弱冠登隆慶庚午賢書任興平縣令居官廉介有冰蘖聲長子一真孫昆韞俱列明經季子六藝孫昆興并登鄉薦賢科濟美僉曰純孝所致迄今猶祀鄉賢



吳永裕字宏軒中隆慶庚午鄉試清慎儆儻廉幹有膽初任山東恩縣知縣魯府之國輦路所經舉無稱其旨者抵恩供擬悉符典禮王太嘉賞疏賢能第一陞御史尋按陝西茶馬再轉本省大巡永裕闕辭一省無再按之典上曰鍊面之臣何嫌觸忌遂拜命甫到任卒至今春秋時祀焉

王以旌號聘廬天性孝友博學篤行中萬歷己卯鄉試授東阿知縣阿瘠凋甚以旌殫力治之創善政十五條剔弊治十七條百姓誦之兩臺兩臺命



鐫石於縣門永著爲令會按院姚東巡至阿面嘉  
之曰二十七州縣唯王東阿循聲特著若衆共勉  
之平章于文定公亦亟稱其清廉敏慎諸善備焉  
薦牘十三上擬行取頃以勞瘁解綬士民泣送百  
里外卒年四十九祀東阿名宦並鄉賢

張淮襄城進士仕副都御史初宰山陽歷御史再  
巡陝西值歲祲全活甚衆開金州赤崩灣灌田千  
餘頃居民稱利公性耿介其治以潔已愛民爲先  
孝宗朝以謫官起奉勅巡撫順天整飭薊州等處



邊備公躬擐甲冑身先士卒相其要害處築墻設  
禦綿亘三三百里屹竝如畫小响水谷河深處每  
冬水涸易偵以入公命橫列葦柴淋以水冰結如  
墻相傳奇之順天永平旱躬親賑濟招集流亡數  
千餘家未幾以疾卒於官賜祭塋廕一子

姚汝耔襄城舉人仕平涼府知府多惠政引涇水  
灌田利民民歌曰姚公之來漑田億頃有比其稌  
有垂其穎不雨恩沱不雷澤永嗟公莫去免我心  
恟擢關內道爲隙者所中不獲遷祀陝西名宦



劉澤遠襄城人諸生時卓犖有大志以選貢任禮  
縣令歷陞同知加運同銜初任禮崇文敦儒禮人  
始知重學累署定遠潁上鳳陽等縣事政尙寬惠  
又署鳳陽理刑隨御史巡行御史奇其才剔奸釐  
弊公力居多及新興其俗蠻漢雜居亦以寬惠治  
之新民皆悅其治雲也不辭勞瘁不避忌諱不憚  
權貴是時滇俗用貳公建議鼓鑄當事悉以委公  
三年得錢息四十餘萬又委清理通省行稅得稅  
銀四十餘萬後安酋叛卽出前後所貯八十餘萬



金餉兵大破安酋全滇無虞又建議屯田通溝洫  
滇民至今賴之公以文顯有治才遇事煩劇簡而  
有餘歷任二十餘年特恩屢加誥命是其經國惠  
民實政偉績之所致也迄今禮邑新邑生祠猶巍  
然焉

趙進字抑之鄆城人幼穎悟家貧博涉羣書年二  
十八登成化辛丑進士授刑部主事陞員外郎清  
苦執法治獄平允司寇屠公肅禮敬之居二年丁  
外艱服闋以廷臣薦擢山西按察司僉事清操愈



勵嘗條陳十事上獻悉禦邊急務都憲楊公謚觀其奏曰經濟才也皆次第舉行之

楊繼芳字美傳鄆城人博學直行任歸德訓導有庠生鄧杖策娶子婦遇邪歸則兩婦父母不能辨繼芳作文禱神以驅之邪遁陞濟南教授不赴家居三十餘年壽躋大耄子孫皆能世其家學

韓可興字龍洲長葛人與弟可大孝友相勉有布被之風鄉閭莫不欽其德門徒百餘人教先德行而後文藝應明經選爲漆園學博士子飲其和而



樂其儆焉上官廉知其才委代蒲庖百姓歌曰美  
玉晶瑩秋月皓徹玉月易求明公難得遷湖廣天  
桂令蒲民扳轅不得製行樂圖送至其家涕泣而  
去至楚化苗格頑人人尸祝遂遷長沙別駕其於  
民也不以刑督惟尙德化故其言曰坊表自樹夙  
夜不欺當世必有諒之者况誠能動物推之無不  
準者乎壽六十五卒祠鄉賢

李春英字涵萼長葛舉人授玉田令未幾以憂去  
服闋補肥鄉令縣故多盜英下車集諸父老子弟



訓誠勲懇有犯者諭而遣之期年萑苻無警士民  
胥慶循聲甚徹選授南戶曹出爲廣西桂林知府  
文武兼資經權互操蠻粵畏而愛之兩臺獎其才  
方欲題補蒼梧道決意致政歸享年六十七而卒  
子又新以明經授府佐邊陲告警乃仗義從戎設  
伏制勝屢建功績孫菁芝登丙子賢書城陷殉難  
黃家才字柱明長葛明經授天長訓導課士有聲  
遷青城令其爲治嚴於馭役而寬於教民青邑賦  
役繁重疲於轉輸京邊外費以俸給之民賴其惠



天津米豆徵調甚急勒限催解止索實收不使中飽雖嚴民弗怨也三年報政威化大行其廉介如一日慨然致政歸居家儉約以周族黨時葛邑久乏科第因詳其地勢倡建文昌閣於城東隅以培風脉科甲至今相繼焉屢舉鄉飲大賓不赴卒年七十四崇祀鄉賢長子朝聘死節次子朝薦成進士

國朝盧六藝字念嵩崇禎丙子舉人順治初年任遵化知縣治教嚴明威惠並著擢工部主事陞員外



卽時封疆初闢特簡爲廣東左布政使王駕南征  
六藝翊輦隨行所至莫不歸順凡錢穀簿書唾手  
立辦以勤勞王事卒於粵叙功贈祖父如其官廕  
一子爲官生

吳梁字柱國號大樸領康熙壬子鄉薦除福建永  
定令有惠政金鋒里民數叛殺典吏公親詣其巢  
穴諭以恩威感以德義衆咸帖服大吏聞於朝陞  
戶部主事歷員外郎中擢御史望重臺端青陽吳  
勲贈詩有名臣屢奏廉平績聖主深知清白心之



甸歷鴻臚太常大理三卿仕至宗人府府丞 誥  
授通議大夫年近八旬迄休歸里卒於家子寶林  
瑤林俱登賢書孫煥廕中書舍人

張星字宿伯康熙辛酉舉於鄉天性純篤事親孝  
謹當授書時父與一硯星對之未嘗有惰容父沒  
常執硯以泣祖母及母在堂有可慰悅其意者力  
爲承歡時人以萊綵比焉弟參醇朴而病目分居  
時星以祖宅厚產讓之參子月峯資其訓誨後中  
甲子亞魁胞叔田少丁多度用暨賦稅莫辦星周



濟外仍爲完納二十餘年國初任鄧州學正後補  
汝州學正澤沛膠庠二州士子皆尸祝焉

袁皞字際熙中丙戌進士工於文藝尤潛心理學  
爲睢陽教授啟迪後進文行兼勗受業數十人皆  
登科第後遷浙江仁和令調浦江令

宋逢泰臨潁進士由唐縣令陞禮部主事清勤自  
勵卓有聲稱以病休致

潘執中字允恭臨潁舉人任汝州學正性坦易勤  
訓課時土寇爲害中與州牧登城守禦賊衆至城



下望見之謂其衆曰潘公好人不可犯遂引去年八十餘卒於官汝人思之爲立碑有曰以愷悌之心敷時雨之化非諛言也

賈壯字弱侯襄城進士性至孝贈公病痢久不愈虔禱於神假寐有告之者曰蒲公英可愈時冬積雪覓山谷得二三莖服之瘥羣謂孝感所致初任懷寧令戮僞使修武備謹斥堠民賴以安擢戶部主事遷員外郎督餉鼓鑄權稅所在以廉幹著歷榆林兵巡僉事



侯抒慤字爾謨襄城進士初任河南府教授既至  
闢講堂日與生徒發明二程之旨卓異遷濰縣令  
以廉介聞擢戶部主事

耿應張字覲宸襄城進士初授荊州府推官執法  
如山人不敢干以私然期於平允而不苛也讞贖  
賴以平反者甚衆順治十年荆大水城不沒者數  
版捐俸市布更令人以布贖罪作土囊以禦之城  
賴以無虞當是時姚黃據巴東等處王二等與爲  
聲援其勢張甚公手畫四策上陳制府當事善之



遂以兵事委公公亦以征勦爲已任三楚蕩平皆公之力 詔以科道擢用補廣東道御史詳一統志與從子休焞同祀忠義

侯瑜字澠生杼櫨次子襄城人由進士授石城縣令平鹽販收發之高下汰水腳幫造之浮費構學舍而誨士子創啟八十年未開之科名禱隍廟而息虎災嬌美千載上潮陽之政治歿於官石民念遺愛而建祠以祀

李賁字又彬鄆城人甫七歲母病憂形於色每黎



明進湯藥畢方赴齋肄業及逝哭泣三年十七歲  
遊泮丁卯選拔丙子鄉薦及辛巳大荒鬻產賑饑  
存活甚衆順治丙戌成進士初授中書頒詔大同  
陞工部主事預修乾清宮成賜緞馬差龍江分司  
溢額悉除再差蕪湖盡草餘稅復差中河旋陞本  
部卽中濬河築堤漕運無壅父母兩荷榮褒丁酉  
八月告假遷塋事竣感疾卒祀鄉賢

尹奇遇字覺斯長葛拔貢授山東按察司經歷署  
高苑縣事值連歲荒歉民多流離徵調甚急不忍



催迫呼民婉諭之民感其仁而泣遇對之亦泣時  
有鬻子女完糧者廉其情揮之去曰離人骨肉完  
我考成於心何安卽以原銀給還令贖自是任檄  
雨催不復徵比竟以催科政拙罷職苑民扶老攜  
幼泣請於上曰荒亡之餘令不忍追呼實繫我輩  
拖欠令何與焉臺使亦深惜之歸家以淡薄自甘  
寄情詩酒與弟奇逢友愛唱酬人皆敬慕之苑民  
至今尸祝不替

張衷恪字惕若長葛進士授竹山令惠政良多尤



重文教雅造人材邑居山險最難徵輸感以至誠如期完納俗尙潭神愚民事之甚謹恪灼知淫祀集木主盡投於河丁外艱再補雲夢操守益廉值歲饑殫心經畫民免枵腹築堤疏河修學育士教養備至以疾卒於官人共惜之

李重素長葛拔貢辛酉膺鄉薦授浙杭仁和令有愛民如子聽斷如神之頌以父年高請終養引掖後學成就甚夥補山東城武令兩次賑饑備極撫綏之道民感其德癸卯甲辰分闈元魁悉出其門



年老告歸壽八十六歲卒

屈宜伸字舒菴進士初任湖南桃源縣尋補沅陵縣有政聲沅人立生祠尸祝之

孫元兆許州廩貢初仕新野訓導新民楊交聚衆爲亂與城守外委蘇占鰲謀身入賊巢諭以恩威亂遂平以功歸占鰲補商城訓導陞安陽教諭訓士有法諸生被其栽培有品居八座者告歸喜書翰臨摹不輟以壽終

杜琮字良玉歲貢生任封邱訓導善訓迪成就門



下土甚多

孫元淵任浙江清鎮巡檢鎮有父首其子者淵訊不遽治子以法歷舉古來慈孝反復開導子痛自責父亦悔遂如初淵離任父子扳轅送百里外涕泣去

齊森字盛木舉人歷署靈寶蘭陽裕州郟縣淇縣學事實授固始上蔡教諭課士嚴明所在胥重其德

張羽字騰雲任湖北光化縣巡檢護理縣印清廉



自矢有勸之積金者應曰吾恐爲子孫淫奢之資耳

孫樹南字萼堂進士選福建歐寧令改直隸獻縣連丁內外艱廬墓六年服除赴閩署漳州府同知補惠安縣秋試同考官調安溪歷南安晉江再弭民鬪同安民鬪甚聲言燬米市衆惶潰兩臺飛檄調治公星夜赴同廉其尤者法處百餘人鬪弭李撫軍贈楹帖曰晉侯教民示之以信子產爲政不專於寬公所在著循聲其政教入同尤深同人德



之爲建生祠縣治西立石鐫所以不忘公者

黃廷萱字樹堂舉人任息縣教諭勤於訓課歷十  
餘載息之士至今懷之解組歸行李蕭然祇素所  
玩好者一慈竹一溪石

王桂源字觀瀾進士除彰德府教授以端士習爲  
急務與諸生言每至天人理欲之界反覆申析一  
如語家塾子弟然囊橐蕭然弗恤也受陶鑄者莫  
不彬彬焉質有其文射策發科接踵後先卒之日  
棺歛皆資於諸生櫬歸諸生徒步執紼送至數十



餘里流泣不忍去予金生珪台胥髫年爲博士弟子克以學行世其家

孫嘉楨監生吏部司務陞工部屯田司主事剛直識政體湖省請開施南州楨謂施州得不償費閉已久復開徒累民執政韙之遂止蘊少司空以銅數缺額命主者開單具稿請交吏部查議楨對曰滇省銅務連歲參罰今不副額數無多宜候補解似不必遽登白簡蘊公深以爲可

孫嘉楹監生甘肅試用通判署兩當縣寧州甚得



民心補授西寧府巴燕戎格撫番通判署寧夏縣  
事時新疆阿什哈兒軍興復委署靜寧供辦兵差  
往返允協事平以軍功加級候陞過勞致疾卒於  
官

長厚

東漢陳實字仲弓潁川許人也出於單微自爲兒童  
雖在戲弄爲等類所歸少作縣吏常給事廨役後  
爲都亭刺佐而有志好學坐立誦讀縣吏鄧紹試  
與語奇之聽受業太學後令復召爲吏乃避隱陽



城山中時有殺人者同縣楊吏以疑實縣遂逮繫  
考掠無實而後得出及爲督郵乃密託許令禮召  
湯吏遠近聞者咸歎服之家貧復爲郡西門亭長  
尋轉功曹時中常侍侯覽託太守高倫用吏倫教  
署爲文學掾實知非其人懷檄請見言曰此人不  
宜用而侯常侍不可違實乞從外署不足以塵明  
德倫從之於是鄉論怪其非舉實終無所言倫後  
被徵爲尚書郡中士大夫送至輪氏傳舍倫謂衆  
人言曰吾前爲侯常侍用吏陳君密持教還而於



外白署比聞議者以此少之此咎由故人畏憚強  
禦陳君可謂善則稱君過則稱己者也實故自引  
謙聞者方太息由是天下服其德司空黃瓊辟選  
理劇補聞喜長旬月以期喪去官復再遷除太邱  
長修德清淨百姓以安隣縣人戶歸附者實輒訓  
導譬解發遣各令還本司官行部吏慮有訟者曰  
欲禁之實曰訟以求直禁之理將何申其勿有所  
拘司官聞而嘆息曰陳君所言若是豈有怨於人  
乎亦竟無訟者以沛相賦斂違法乃解印綬去吏



人追思之及後逮捕黨人事亦連實餘人多逃避  
求免實曰吾不就獄衆無所恃乃請囚焉遇救得  
出靈帝初大將軍竇武辟以爲掾屬時中常侍張  
讓權傾天下讓父死歸塋潁川雖一郡畢至而名  
士無往者讓甚恥之實乃獨弔焉及後復誅黨人  
讓感實故多所全宥實在鄉閭平心率物其有爭  
訟輒求判正曉譬曲直退無怨者至乃嘆曰寧爲  
刑罰所加不爲陳君所短時歲荒民儉有盜夜入  
其家止其梁上實陰見之起自整拂呼命子孫正



色訓之曰夫人不可不自勉不善之人未必本惡  
習以性成遂至於此梁上君子者是矣盜大驚自  
投於地稽顙歸罪實徐譬之曰視君狀貌不似惡  
人宜深克己反善然此當由窮困令遺絹二匹自  
是一縣無復盜竊太尉楊賜司徒陳耽每拜公卿  
羣僚畢賀賜等常歎實未登大位愧於先之及黨  
禁始解大將軍何進司徒袁隗遣人詣實欲特表  
以不次之位實乃謝使者曰實久絕人事飾巾待  
終而已時三公每缺議者歸之累見徵命遂不起



閉門縣車棲遲養老中平四年年八十四卒於家  
何進遣使弔祭海內赴者三萬餘人制衰麻者以  
百數共刊石立碑謚爲文範先生有六子紀諶最  
賢紀字元方亦以至德稱兄弟孝養閨門雍和後  
進之士皆推慕其風及遭黨錮發憤著書數萬言  
號曰陳子黨禁解四府並命無所屈就遭父憂每  
於哀至輒嘔血氣絕雖衰服已除而積毀消瘠殆  
將滅性豫州刺史嘉其至行表尙書圖百城以厲  
風俗董卓入洛陽乃使就家拜五官中郎將不得



已到京師遷侍中出爲平原相往謁卓時欲徙都  
長安乃謂紀曰三輔平敞四面險固土地肥美號  
爲陸海今關東兵起恐洛陽不可久居長安猶有  
宮室今欲西遷何如紀曰天下有道守在四夷宜  
修德政以懷不附遷移至尊誠計之末者愚以公  
宜事委公卿專精外任其有違命則裁之以法今  
關東兵起民不堪命若謙遠朝政率師討伐則塗  
炭之民庶幾可全若欲徙萬乘以自安將有累卵  
之危崢嶸之險也卓意甚忤而敬紀名行無所復



言時議欲以爲司徒紀見禍亂方作不復辨嚴卽  
時之郡璽書追拜太僕又徵爲尙書令建安初袁  
紹爲太尉讓於紀紀不受拜大鴻臚年七十一卒  
於官子羣爲魏司空天下以爲公慚卿卿慚長謚  
字季方與紀齊德同行父子並著高名時號三君  
每宰府辟召常同時旌命羔鴈成羣當世者靡不  
榮之謚平早終

荀淑字季和潁川潁陰人荀卿十一世孫也少有  
高行博學而不好章句多爲俗儒所非而州里稱



其智人安帝時徵拜郎中後再遷當途長去職還鄉里當世名賢李固李膺等皆師宗之及梁太后臨朝有日食地震之變詔公卿舉賢良方正光祿勳杜喬少府房正舉淑對策譏刺貴倖爲大將軍梁冀所忌出補郎陵侯相蒞事明理稱爲神君頃之弃官歸閒居養志產業每增輒以贍宗族知友年六十七建和三年卒李膺時爲尙書自表師喪二縣皆爲立祠有子八人儉緄靖壽汪爽肅專並有名稱時人謂八龍初荀氏舊里名西豪潁陰令



勃海苑康以爲昔高陽氏有才子八人今荀氏亦有八子故改其里曰高陽里靖有至行不仕年五十而終號曰泣行先生淑兄子昱字伯條曇字元智昱爲沛相曇爲廣陵太守兄弟皆正身疾惡志除閹官其支黨賓客有在二郡者纔罪必誅昱後於大將軍竇武謀誅中官與李膺俱死曇亦禁錮終身

鍾皓字季明潁川長社人也爲郡著姓世善刑律皓少以篤行稱公府連辟爲二兄未仕避隱密山



以詩律教授門徒千餘人同郡陳實年不及皓皓引與爲友皓爲郡功曹會辟司徒府臨辭太守問誰可代卿者皓曰明府必欲得其人西門亭長陳實可實聞之曰鍾君似不察人不知何獨識我皓爲林慮長以德政稱頃之自劾去後九辟公府徵爲廷尉正博士皆不就時皓及荀淑並爲士大夫所歸慕李膺常歎曰荀君清識可尙鍾君至德可

師

鍾瑾皓兄子母李膺之姑也瑾好學慕古有退讓



風與膺同年俱有聲名膺祖太尉修常言瑾似我家性邦有道不廢邦無道免於刑戮復以膺妹妻瑾辟州府未嘗屈志膺謂之曰孟子以爲人無是非之心非人也弟何期不與孟軻同邪瑾常以膺言白皓皓曰晉國武子好招人過以致怨本卒保身全家爾道爲貴其體所安多此類也年六十九終於家諸儒頌之曰林慮懿德非禮不處悅此詩書弦琴樂古五就州招九應台輔逡巡正命卒歲容與皓孫繇建安中爲司隸校尉



韓韶字仲黃潁川人辟司徒府時太山賊公孫舉  
僞號歷年守令不能破散多坐法尙書選三府掾  
能理劇者廼以韶爲嬴長賊聞其賢相戒不入嬴  
境餘縣多被盜寇廢耕桑其流入縣界求索衣糧  
者韶開倉賑之所廩贍萬餘戶主者爭謂不可韶  
曰長活溝壑之人而以此伏罪含笑入地矣太守  
素知韶名竟無所坐

金魏文仲襄城人承安中進士性好淡泊讀書學道  
故仕宦不進平居好歌東坡赤壁詞臨終沐浴易



衣召家人告以後事卽命閉戶牀上誦赤壁詞又歌末後二句歌罷怡然而逝

元張孝基許昌人娶同里富人女富人只一子不肖斥逐之富人病且死盡以家財付孝基與治後事如禮久之其子丐於途孝基見之惻然謂曰汝能灌園乎答曰如得灌園以就食何幸孝基使灌園其子稍自力孝基怪之復謂曰汝能管庫乎答曰得灌園已出分外況管庫又何幸也孝基使管庫其子頗馴謹無他過孝基徐察之知其能自新盡



以其父所委財產還之其子由此治家勵操爲鄉  
善士不數年孝基卒其友數人遊嵩山忽見旌幢  
騶從滿野如守土大臣竊視之專車者乃孝基也  
驚喜前揖詢其所以致此孝基曰吾以還財之事  
上帝命主此山言訖不見

馮夢周字士可潁川人所著有續積善錄畧曰一  
不可亂人男女二不可負人錢穀三不可占人田  
宅四不可奪人玩好五不可妄求人財六不可責  
備人飲食七不可揀擇便利處自處八不可品藻



優劣前輩九不可毀長上及他人文字十不可互  
相品題標榜十一不可自滿自矜十二不可酣飲  
酒肆恣意遊蕩十三不可好勝鬥訟十四不可以  
怒氣加人

明吳梗許州人任濟南府經歷其先代輸粟計五千  
石蒙旌表梗繼述樂事隆慶時大祲出粟千石以  
賑上聞旌立世義坊萬歷歲兩饑復賑以粟出千  
金修城南三券橋七遇鄉飲壽躋九衮人皆仰其  
德義云



謝顏教字伯愚園城人登萬歷丙辰進士事親孝  
處衆和嘗曲全族人父子得延絕嗣助人婚喪設  
粥賑饑不望券書不問田舍轉餉宜大絕陋規卻  
餘羨嘗因思親避典試差歸里刻感應篇勸世入  
鄉賢祠

申以和許東鄉人好義樂施賻助塋婚不責其報  
解紛排難一方訟獄衰息設館延師訓其宗人子  
弟成就甚多

魏校本州貢生天性惇樸持已端慎而又不與物



忤有田五十頃稅完而代親友舉火者三百家桑梓戴之子孫俱登第真積善餘慶云

呂養正長葛監生授徐州經歷廉靜醇謹遇人渾渾不露圭角人稱曰呂佛享年八十有七

許高節長葛人冲雅退讓有古君子風嘉靖初當貢期憫其表兄張魯年老讓之督學優獎已而連丁內外艱遲數年始得亦不悔也又讓產於兄助叔之塋爲從昆季完婚事好義周急指不勝屈由海豐訓導仕至王府教授年九十卒子孫克繼書



香焉

崔攀龍字翰如臨潁人少穎悟有才名崇禎癸酉登賢書閉戶自守人以長者稱之事父母能順志無違於諸兄備盡恭讓毫無私恡及析居腴產沃壤盡讓諸兄而自取其瘠者其諸人及族人之俊秀者皆爲延師教之貧者仍給其衣食孝友嫻睦人稱之無間言

賈彬字文質臨潁人平生以善自娛家甚貧臨財之際一介不苟暇惟閱史鑑意有所會豁如也居



恒慕龐德公以安遺子孫見爭訟不義輩輒退避  
之不與共言鄉人稱厚德者歸焉卒年九十

丁梁棟臨潁鄉飲者賓知縣梁璜匾其門曰達尊  
有二

國朝黃朝薦字狄門長葛人舉丙戌進士端樸簡重  
初任潞縣知縣慈敏著聲繼而退居林下詩酒嘯  
傲薄情軒冕撫孤幼賑貧乏善行不一大率與物  
無競四方人士咸以長厚歸之忽一夕安寢不疾  
而終崇祀鄉賢



李起長葛人孝友嗜學負盛名以明經爲濟源學  
博修學訓士有功於庠序居鄉謙謹人皆愛慕之  
闖寇陷城被執訊之輿論咸誦其德遂釋之後累  
舉鄉飲賓九十二歲卒

李鈞衡長邑庠生敦本睦族有族人占其產可值  
百餘金不與爭辨後族人負官銀而逃衡售已產  
以償之迨歸仍以所存之產給其人比族之絕墳  
皆爲祭埽族有遺孤善撫養焉他如讓地修橋爲  
善不一巡道沈公給匾表之子重素登賢書



井見田字德普襄城庠生資政公濟之子性醇謹  
遇人無少長一接以誠雖農夫野老時共杯酌未  
嘗有疾言遽色毫無貴介習與人交不欺然諾雖  
傾蓋如久要尤慷慨好施予周急恤危傾囊不吝  
於諸從昆弟子姪友愛彌篤或割田濟貧乏出貲  
助婚葬皆所樂爲者

宋學易襄城耆民躬耕行善敦倫於門內周恤於  
鄉隣年九十四給八品頂帶

王欽鄆城人天性孝友凡親所遺財產聽弟取用



無爭端待其妹衣食常繼聞人急難竭力相助捐貲以完人婚姻鄉人咸推重之壽逾八旬

李九標郢城人順治二年貢生德性冲和制行端謹明季流寇屠城入其家見橫琴在案卽令鼓之旋訪諸隣人僉曰李某盛德士也琴甫終而賊去保全闔門年逾七旬隱於田野

孫友長葛人四世同居凡百餘口友總家政不事私產訓子弟以禮屢舉鄉飲妻魏氏有淑行友卒魏亦不食而死



孫六鳳字廷儀許州人天資聰穎博極羣書下筆  
悉驚人語入黌序試輒高等事親以孝聞課子弟  
於碧虛園中一遵鹿洞規條于明季歲荒土寇蠭  
起廷儀捐米五百石助賑募義勇爲捍禦計一方  
賴以保全順治十四年義王內拊撫藩憲至許迎  
勞借其園設宴卽俾勦宴事彬彬然無失禮晚年  
涵養功深冲和恬靜與物無忤人咸稱爲有道云  
嘉慶年間旌表入鄉賢祠

秦生泰歲貢仕泌陽訓導天性惇樸持已謹嚴終



身不與物競

馬曰敏庠生性冲和平易近之者如飲醇醪學有根柢設帳授徒因材啟迪後學多所成就

王師濂增生惇謹老成與人無忤公門不入惡言不出有古君子風

盧正辰增生天性孝友礪廉隅慎言語以成就人材爲已任開塾教授生徒貧者助以膏火以故四方來學者衆

魏嘉木明經性質謹嚴凜凜然若有不可犯者而



未嘗有戾俗之意學人恒樂就之

劉培基嗜學有時名設家塾教授二十餘年束金不言有無爲人渾厚和平羣稱爲長者

鄭修道石固鎮人平生慎密自持言笑不苟歲饑幾不能存或勸求濟於生徒則曰如此荒年誰是有餘資者

于廷柱生平好勸人善遇隣族忿爭必力爲排解使彼此各釋而後安有堂弟素無行賣居宅於柱柱辭宅付金後弟金盡又固賣之柱復付金如是



者數里黨代爲不平而柱了無怒意其雅量洵有不可及者

賀中鰲庠生居家孝友訓姪允平與六子俱入庠四方景其風受業成名者以數十計爲祖父建祠宇朔望率族黨拜謁禮畢爲講孝弟忠信禮義廉恥族黨咸敬聽之學正李題其門屏曰竇陳遺範李生字盤根庠生性醇謹臨財不苟要言必復在鄉黨間從無疾言遽色乾隆二十一年舉鄉飲僎賓



李壬淵增生溫厚平和與物未嘗少忤甘清貧恒  
杜門博覽經史子集外事弗與聞也偶夜伏案假  
寐燈熒熒然有小竊入驚寤卽取所披青衫與之  
曰質此可以佐汝一日餐其人愧殺逡巡而出後  
遂改行爲善論者謂有王彥方陳仲弓風焉年七  
十四無疾終

韋映斗誠謹謙和處已待人不露圭角讓沃產於  
兄教諸姪猶子

高炎渾厚坦夷不立崖岸與弟琯相友愛後以食



指繁多析箸田產任瑄自擇處鄉黨常思有以下人者

趙良夫存心寬厚以古道自期常戒其子曰勿凌弱暴寡勿重財輕義平生濟貧周急里黨多蒙其惠監生陳大勇渾厚有古風鄉里咸重之

孫紹楚號麓村附貢恬靜寬和仕主簿告歸足跡不履城市開碧虛園課子孫讀其中士林重之僉曰誼如麓村先生乃吾輩師程

菅芬忠厚爲質樂善不倦五子俱列黌序孫相繼



入庠者十人人咸謂厚德報云

孫紹炳附貢閉戶讀書隻字不入公門族黨俊秀者每歲延師教之賻助婚塋不望其報乾隆五十一年歲荒施米麥百餘石全活甚衆

劉元屏性寬和好善樂施弟監生元魁幼與同志嘉慶癸酉歲荒里中貧乏者咸待以舉火越明年豌豆熟攘奪紛如元魁豆數十畝旁村鳩衆將刈之時元魁赴市弗聞也自市歸遙望豆堆場中異之比至始知合里共爲禦侮收穫其兄弟厚德及



人徵之此事益信

李永豐耆民謙恭持已忠厚待人間有以非禮加者絕不與校曾元繞膝雖農家子咸恂恂有髦士風

王殿彥廩生幼失怙恃依諸父居始終無間言量渾厚生平不談人過有拂意者但不與久處而已張天健家世善良而健性尤敦厚精醫理全濟甚多分毫無所取生平寡言語減色笑與人言聲僅可聞而義理最詳與人無忤人亦無以非禮相干



者

孫遇申武生性恬靜與物無競宅近市恒杜門不出課子弟維嚴里黨偶有忿爭聞其一言無不釋者與兄弟析居沃產悉推讓之至今稱盛德焉

風節

東漢劉陶字子奇一名偉潁陰人濟北貞王勃之後爲人居簡不修小節游大學時大將軍梁冀專朝而桓帝無子災異數見乃上書陳事不省有言貨輕錢薄宜改鑄大錢事下四府陶復上議止之冀



州刺史朱穆徵諸廷尉輸作左校陶率太學諸生數千人詣闕訟願黥首繫趾代穆校作後舉孝廉除順陽長縣多奸猾陶覆按姦軌所發若神頃拜侍御史靈帝宿聞其名數引納之時鉅鹿張角以左道惑民陶與奉車都尉樂松議郎袁貢連名上疏言前司徒楊賜奏勅州郡護送流民然後誅其渠率會賜去位不復捕今雖會赦令而謀不解散宜下明詔重募角等賞以國土帝殊不悟方詔陶次第春秋條例明年張角反海內鼎沸帝思陶言



封中郎鄉侯尋拜侍中以數切諫爲權臣所憚徙  
爲京兆尹到職當出修官錢千萬陶恥以錢鬻職  
稱疾不視事帝宿重陶才原其罪徵拜諫議大夫  
時天下日危寇賊方熾陶憂致崩亂復上書陳之  
又陳當今要急八事大較言亂由宦官宦官事急  
共讒陶與賊通收下黃門北寺獄按掠日急陶自  
知不免遂閉氣而死天下痛之所著七曜論匡老  
子反韓非復孟軻及賦奏書記辨疑凡百餘篇  
李膺字元禮潁川襄城人也祖父修安帝時爲太



尉父益趙國相膺性簡亢無所交接唯以同郡荀  
淑陳實爲師友初舉孝廉爲司徒胡廣所辟舉高  
第再遷青州刺史守令畏威明多望風棄官復徵  
再遷漁陽太守尋轉蜀郡太守以母老乞不知官  
轉護烏桓校尉鮮卑數犯塞膺常蒙矢石每破走  
之荀爽嘗就謁膺因爲其御旣還喜曰今日乃得  
御李君矣其見慕如此永壽二年徵爲廣遼將軍  
振聲遠域再遷河南尹司隸校尉除奸惡不避權  
貴是時漢政日替綱紀頽弛膺獨持風裁以聲名



自高士有被其容接者名爲登龍門

陳翔字子麟汝南召陵人也祖父珍司隸校尉翔少知名善交結察孝廉太尉周景辟舉高第拜侍御史時正旦朝賀大將軍梁冀威儀不整奏冀恃貴不敬請收案罪時人奇之遷定襄太守徵拜議郎遷楊州刺史舉奏豫章太守王永奏事中官郡太守徐參在職貪穢並徵詣廷尉參中常侍璜之弟也由此威名大振又徵拜議郎補御史中丞坐黨事考黃門北寺獄以無驗見原卒於家



晉荀闔字道明亦有名稱京都爲之語曰洛中英英  
荀道明大司馬齊王問辟爲掾問敗暴尸已三日  
莫敢收塋闔與問故吏李述稽含等露板請塋朝  
議聽之論者稱焉明帝嘗從容問王廙曰二荀兄  
弟孰賢廙答以闔才明過邃帝以譖庾亮亮曰邃  
眞粹之地亦闔所不及由是議者莫能定其兄弟  
優劣歷御史中丞侍中尙書封射陽公卒謚曰定  
子達嗣

唐王求禮許州長社人武后時爲左拾遺監察御史



后方營明堂瑯飾譎怪侈而不法求禮以爲鐵鸞  
金龍丹雘珠玉乃商瓊臺夏瑤室之比非古所謂  
茅茨采椽者自軒轅服牛乘馬今輦以人負則人  
代畜上書急切久不報契丹叛使孫萬榮寇河北  
詔河內王武懿宗禦之懦擾不進賊敗數州去懿  
宗乃條華人爲賊誣誤者數百族請誅之求禮劾  
奏曰誣誤之人無良邊吏教習城不完固爲賊脅  
制寧素持叛心哉懿宗擁兵數十萬聞敵至走保  
城邑今乃移禍無辜之人不亦過乎請斬懿宗首



以謝河北懿宗大懼后盡赦其人當是時契丹陷幽州饋輓屈竭左相盧欽望請停京官九品以上兩月俸助軍與求禮曰公祿萬鍾正可輟仰祿之人可奈何欽望拒不應既奏求禮歷階進曰天子富有四海何待九品俸使宰相奪之以濟軍國用乎姚珪曰秦漢皆有稅算以佐軍求禮不識大體對曰秦漢虛天下事邊奈何使陛下效之后曰止久視二年三月大雨雪鳳閣侍郎蘇味道等以爲瑞率羣臣入賀求禮讓曰宰相燮和陰陽而季春



雨雪乃災也果以爲瑞則冬月鳴雷爲瑞雷耶味  
道不從旣賀者入求禮卽厲言今陽氣僨升而陰  
氣激射此天災也主荒臣佞寒暑失序盜賊繁興  
正官少僞官多百司非賄不入使天有瑞何感而  
來哉羣臣震恐后爲罷朝神龍初終衛王府參軍  
朱范正平字子彛許州人純仁之子學行甚高紹聖  
中爲開封尉蔡京欲爲向后家奪民田以拓塋地  
民訴之正平執不從京銜之以事下詔獄會赦歸  
頽昌正平著荀里退居編以壽終



李兌字子西臨潁人登進士第由屯田員外郎爲  
殿中侍御史按齊州叛卒獄成有欲夜篡囚者兌  
以便宜斬之人服其畧張堯佐判河陽兌言堯佐  
素無行能不宜以戚里故用改同知諫院狄青宣  
撫廣西任守忠爲副兌言以宦者觀軍容致掣肘  
非計仁宗爲罷守忠積官工部尙書致仕卒諡曰  
莊

元鉄文中臨潁人幼嗜學有才望至正間仕監察御  
史性鯁直激濁揚清有古臺諫之風



明徐斗牛字光墟許州人中萬歷戊子科亞魁登乙  
未進士初任洛南令有政聲調繁渭南仁愛節廉  
民咸德之渭舊有鉄礦中使歷來恣虐於縣官不  
敢禁斗牛至治抗不肯屈且欲繩以禮法使啣之  
思中以奇禍斗牛憤懣卒於任御史以其事聞使  
亦懼死因罷礦使不復設朝廷嘉其直行贈禮部  
儀制司主事建坊褒忠崇祀鄉賢

李凱臨頽歲貢官給事中沈靜寡欲忠直不憚每  
諫務在必行洪武間以言獲罪除籍歸越數年帝



忽思凱風節趨召入中途病卒

程達字德孚臨潁人少負奇氣有才名由歲薦爲御史多所建白以言坐罪除籍歸徒行惟一僕負擔居縣西郭外茅茨三間衣食弗給恬然處之

王睿字思聰臨潁歲貢人監授東安令以十五事諭民切中時弊逾年政平訟理宣德中舉循良陞台州知州民詣闕奏畱者幾三千人累疏民隱中官侯泰嘗奪東安民田數頃睿奏之竟如所請可謂不畏強禦者矣曾孫金成進士由部屬陞浙江



僉事會兩浙大饑入境卽發廩賑貸時中官鎮守  
非賄則中禍有以白米千石投金者金詰之對曰  
爲災傷冊并爲釋禍需耳金曰爲民而殃民可乎  
遂揮去人稱其有祖風云

辛訪字咨道襄城進士爲監察御史奉勅犒邊戍  
有名遷浙江按察僉事戢礦盜捕治桐江大姓不  
爲權貴所脇及巡海奸民屏息

李敏字公勉襄城進士天順中黔苗梗化命以御  
史往撫之比還巡畿內謂運餉薊州必由海道多



遭覆溺建議別鑿三河直抵薊州軍民便之後  
撫大同等處運邊糧者歲數萬石道險遠率倍費  
始達計歲會外令易銀給將士以其餘市戰馬治  
軍喪後遂爲常成化間歷陞戶部尙書上言鹽課  
爲國用所資宜簡命風憲大臣理之詔如議畿內  
有隙地貴戚初乞不與而以與民後復有欲得者  
公力爲之爭仍與民又有乞鷹房牧馬場千頃者  
公言不可奪民耕種之地爲飛放之所上皆允之  
時京師水詔百官陳得失公因言畿內皇莊僕暴



橫宜勒歸其人所有租稅止令有司輪納等數事  
皆人所不敢言者在戶部五年以疾休卒贈太子  
少保諡恭靖

姚汝臯襄城進士任大理評事值武宗巡遊上疏  
諫上上怒廷杖爲民世宗入繼復官大理會議廟  
諡大禮公謂生前北面事之薨後合祭而享恐先  
王在天之靈亦不安也疏入上怒命杖降照磨尋  
陞兵部主事歷四川參議屢與當事意相左不悅  
公公自分直道難容遂致仕歸里曰貧如諸生時



辛自修號慎軒襄城人生有奇質年十二遊邑校  
十五舉鄉薦以進士仕至宮保初任陽曲擢吏科  
糾劾不避有破柱風數居顯宦皆有能名實效南  
京掌院時臺中肅然適左都御史缺廷兩推上皆  
抑之問曰向執法南臺者獨非真御史乎特旨內  
用因蠻語求去賜傳歸山居讀書著有聞過等集  
上每惜公不盡用陞南刑部尙書旋改工部皆辭  
不就卒贈太子少保諭葬祭諡肅敏

徐洛許人明嘉靖庚子鄉薦明年試禮部中式甲



辰始廷對舉秦鳴雷榜進士初授行人陞陝西道  
監察御史公丰神冷峭時出袖中彈書舉朝憚之  
有真御史及鉄面直指之稱命巡蘇松等處辨豐  
興兒結冤決吳儔家疑獄觸權貴出知湖州謠曰  
徐其來只民其福只累轉山東憲副值日本有變  
命公率萬夫往剿公設計智取弩火並攻俘斬無  
算旬日蕩平加一級賜賚極渥因論事忤當事意  
遂浩然來歸杜門著書多行於世捐金置義塚義  
塾沒年四十九守土嘉其德請事上官崇祀本州



鄉賢祠

張寧襄城人號載寓中萬歷乙酉登壬辰進士宰江都時開採狎至中使貴寵自監司以下不敢入公進長揖而已權要有干以私者標其書於門公釐鹺政商斂四千金爲壽庭揮之卒不以利動後轉南部遷鳳陽復力抗中使再留陞夔州道力雪石柱上司馬千乘冤與巡使者不合卽解綬歸劾以擅去不顧也歸隱芙蓉澗廿年山居讀書課子遂無復仕進意公家法嚴勅子弟不得入公門好



善樂施尤喜接引後學創建文昌閣捐俸購書三百餘種置尊經閣上天啟時魏璫擅政論建生祠事下縣首及公笑置不應家人環泣恐爲百口累有以黨錮相勸者公曰皇甫規恥不與黨人同列吾固甘之矣適魏黨敗以免公能詩文前邑乘公所修著作多行於世所居茨溝里本邑譚今因公爲易其里曰慈至今鄉人猶歲致祭尸祝公云張永祺字多祝舉人少負氣節饒有父風公當流寇時分守城東日修戰具夜宿城頭凡捍禦



之需竭貲爲之有曹令者以降表逼公署名公毅  
然曰豈不聞阻建璫祠者爲吾父哉寇至當舉一  
砲相向耳曹數脅之不從乃痛哭負母渡河而北  
史公可法疏薦有破家守城不押降書云汪督師  
次洛陽公步詣軍門具言襄人望救狀汪喜以公  
爲前導進軍於襄流寇環圍公率邑人守城五晝  
夜力竭城陷後於盧家洞爲賊所執逼之跪公大  
罵不屈賊以弦束其脛時日中無雷忽雷電大作  
賊懼乃釋如公者風節表表矣



傳廷獻字夢翁襄城人崇禎癸未進士授兵部主事是時高傑黃得功因揚州爭至碎欽差牌命下着傳主政往調焉公抵其營開導乃大感悟補鎮江知府具九難之揭祈冢宰代奏賜上方劍許以便宜行事時提兵總制發硝於鎮定價三千兩按戶攤繳又取火藥三千斤公皆不應於丹徒索銀萬兩縛庫吏將斬邑令求救公趨制院公堂引據憲章力辨始釋唐王復封過鎮索袍帶銀三千兩公曰未有分封廣東而取銀於鎮者不應延津王



奪桃源民船盤據鎮江索船戶爲換龍袍不遂箠  
將斃送府監候公怒拘王使揭參兩藩卽日引去  
大監奉旨查湖威權赫灼公投名刺而不見其不  
畏強禦類如此卒年八十三

王忠孝鄆城人性孤介不阿居家孝友明初劉誠  
意薦舉授監察御史彈劾有風節著忠孝集行世  
李豫字伯和鄆城人崇禎甲戌進士初授刑部主  
事多釋疑獄擢御史前後上三十五疏有鳴鳳之  
譽母疾親嘗湯藥癸未歸里塋親居鄉遇荒歲施



穀施金全活甚衆又捐千五百金造本邑磚城流  
寇犯境絕飲食死崇祀鄉賢

文苑

東漢荀爽字慈明一名諲幼而好學年十二通春秋  
論語太尉杜喬見而稱之曰可爲人師潁川爲之  
語曰荀氏八龍慈明無雙太常趙典舉爽至孝拜  
郎中對策奏聞卽棄官去以著述爲事遂稱碩儒  
數被徵命及登台司九十五日因從遷長安會病  
薨年六十三著禮易傳詩傳尙書正經春秋條例



又集漢事成敗可爲鑒戒者謂之漢語又作公羊問及辨讖並他所論叙題爲新書凡百餘篇兄子悅或並知名

荀悅字仲豫儉之子也儉早卒悅年十二能說春秋貧無書每見人篇牘過目記憶好著述靈帝時闔官用權悅乃託疾隱居獻帝頗好文學遷秘書監侍中與或及少府孔融侍講禁中時政移曹氏天子恭已而已悅志在獻替作申鑒五卷旣成而奏之曰善帝好典籍常以班固漢書文繁難省令



悅依左氏傳體以爲漢紀三十卷又著崇德正論  
及諸論數十篇年六十二建安十四年卒所著申  
鑒漢紀采入四庫

丁鴻字孝公父緄從光武以功封陵陽侯鴻少受  
尙書於桓榮父歿當襲爵讓於弟而教授里中

繁欽潁川人字休伯以文學知名與太子丕及臨  
淄王植以詩賦交遊唱和贈答酬酢甚密與太子  
賤云近屢奉賤不足自宣頃諸鼓吹廣求異妓時  
都尉薛訪車子年始十四能喉嚨引聲與笳同音



白上呈見果如其言乃知天壤之所生誠有自然  
之妙物也潛氣內轉哀音外激大不抗越細不幽  
散聲悲奪筇曲美常均及與黃門鼓吹溫比迭唱  
迭和喉所發音無不響應曲折沈浮尋變入節自  
初呈試中間二句比欲傲其所不知尙之以一曲  
巧竭意匱旣已不能而此孺子遺聲抑揚不可勝  
窮優游變化餘弄未盡暨其清激悲吟雜以怨慕  
詠邊塞之遐征奏北馬之長思是時日在西隅涼  
風拂衽背山臨溪流泉東逝同坐仰嘆觀者俯聽



莫不泣泣隕涕悲懷慷慨聞也竊惟聖體兼愛好  
奇是以因賤先自委曲伏想御聞必含餘懽冀事  
速訖旋侍光塵寓目階庭與聽斯調宴喜之樂盖  
亦無量

晉棗據字道彥長社人善文詞弱冠辟大將軍府出  
爲山陽令有政績官至太子中庶中所著詩賦論  
四十五首子二腆以文章顯仕至襄城太守嵩才  
藝尤美位散騎常侍爲石勒所害

荀綽字彥舒博學有才能撰後晉書十五篇傳於



世永嘉末爲司徒從事郎中

庾龢字道季潁川人好學有文章名重一時叔父翼將遷襄陽龢年十五以書諫翼甚奇之升平中代孔嚴爲丹陽尹表除重役六十餘事太和初代王恪爲中領軍卒於官

杜育字方叔幼岐嶷有神童之譽及長美風姿富才藻時人號曰杜聖劉令長譏其拙於用長累仕

汝南太守國子祭酒洛陽將沒死於賊

按晉諸公贊以育爲

定陵人當時邑爲襄城郡定陵嘗隸焉晉書云襄城杜育與左思輩齊名號二十四友蓋舉其



郡耳似舊志誤收耿迥吉杜育里居世系考云  
定陵舊城在今之北無渡去襄城之東界十里  
而近定陵既廢自育以上七世故居風隸定陵  
西境者今歸襄城之東境墓域祠碣前輩猶及  
見之育固錄於襄志也惟育爲杜襲之孫襲之  
父根根之父安並有勲名斷以七世故居之說  
應錄之據世說新語  
注及晉書劉琨傳

隋庾自直潁川人父持陳羽林監自直少時好學沈

靜寡欲仕陳歷豫章王府外兵參軍宣惠記室陳

亡入關不得調晉王諱聞之引爲學士大業初授

著作佐郎自直解屬文於五言詩尤善性恭慎不

妄交遊特爲帝所愛帝有篇章必先示自直令其



詆訶自直所難帝輒改之或至於再三俟其稱善然後方出其見親禮如此後以本官知起居舍人卒有文集十卷行於世

唐王建字仲初潁川人大歷十年進士除渭南尉轉昭應丞大理寺丞太和初爲陝州司馬與韓愈張籍同時友善工爲樂府歌行思遠格幽所作宮詞百首宗人王樞密以嘗譏訕憾之刼以宮掖深遠何由得知建不能對復邀爲詩以贈其禍始脫沒後有集十卷采入四庫



蕭穎士字茂挺與李華同年登進士第當開元中天下承平人物駢集如賈曾席豫張垠韋述輩皆有盛名而穎士皆與之遊繇是縉紳多譽之李林甫採其名欲拔用之乃召見時穎士寓居廣陵母喪卽縗麻詣京師徑謁林甫於政事省林甫素不識遽見縗麻大惡之卽令斥去穎士大忿乃爲伐櫻桃賦以刺林甫云擢無庸之瑣質因本枝而自庇泊枝幹而非據專朝廷之右地雖先寢而或薦豈和羹之正味其狂率不遜皆此類也然而聰警



絕倫嘗與李華陸據同遊洛南龍門三人共讀路  
側石碑顗止一閱卽能誦之華再閱據三閱方能  
記之議者以三人才格高下亦如此是時外夸亦  
知顗士之名新羅使入朝言國人願得蕭夫子爲  
師其名動華夷若此終以誕傲褊忿困躓而卒宋  
其集入四庫

按新舊唐書皆未註顗士籍貫而顗士贈韋司業書自稱潁川男子又云

生於汝潁故錄之

宋孫永字曼叔長社人舉進士調襄城尉累官吏部  
尚書元祐初進資政殿學士卒諡康簡永外和內



勁議論常持平不求詭異初神宗問青苗助役之法於民便否對曰法誠善然不能無重斂之患若用以資經費非臣所知也

此傳載河南通志較原稿有體要故置彼登此

王實字仲弓許昌人文恪公陶之子未冠從司馬溫公學溫公不以膏粱畜之教以名節授禮易二經仲弓亦超然不以仕宦進取爲意韓少師持國歸以女仲弓又從受詩祖陶謝韋杜故其文典雅溫麗華暢而不靡詩靜而深婉而厲有一唱三嘆之音未嘗急於人知人亦不皆知仲弓也惟范蜀



公以耆老退居忘年接之元祐初梁右丞燾首薦  
於朝爲藉田令秩滿蘇尙書軾鎮中山辟爲屬不  
行自是浮沈遂欲遠去世故家與范忠宣公有連  
尤爲忠宣公所許崇寧初强起一守信陽歸卽謝  
事挂冠里中葉少蘊守許昌下車亟往過之視其  
貌盎然不爲崖異而簡遠蕭散若初未嘗與世交  
者口吃不能極語徐聽其言衮衮皆有遠致善飲  
酒所居鳳臺園有修竹萬餘本導溪水貫其中水  
木幽茂不覺在都市間聞東南山水之勝輒拊髀



雀躍靖康之難南渡死於鄂之咸寧遺令不爲銘  
文而前自志其大畧使納之壙中其曠達無累於  
世如此

曹組字元寵潁昌人與兄緯有聲太學宣和三年  
登第郊禮進祥光賦換武階兼閣職詔中書召軾  
仍給事殿中著有箕潁集

孫甫字之翰許州人天聖五年同學究出身八年  
再舉登進士第仕至河北都轉運使留侍講卒贈  
右諫議大夫著唐史記七十五卷秀水朱彝尊云



唐史論斷三卷宋尙書刑部郎中充天章閣待制

兼侍讀許州孫甫之韓撰

按唐史記歐陽文忠蘇文忠曾子固李方叔宋

子俱極稱賞

韓元吉維之元孫仕至吏部尙書著南澗甲乙藁

二十二卷桐陰舊話一卷采入四庫

金張伯玉許州人美髯齊於腹入太學有聲稱性極

豪邁嘗從李屏山遊與飲燕市有詩云日日飲燕

市人人識張鬚西山晚來好飲酒不下驢又云昨

日上高樓西山翡翠堆今日上高樓西山死如灰



想見屏山老療饑西山隈飽餐西山色高樓空崔嵬

衛承慶字昌叔襄城人父文仲承安中進士以孝友淳直見稱於鄉黨官至文登令七十餘卒臨終沐浴易衣冠與家人訣怡然安坐誦東城赤壁樂府又歌人間如夢以下二句歌闕而逝昌叔質冲淡有父風乃識路宣叔王逸賓文伯起故其詩如之

王利賓字茂實襄城人樸直純素作詩有古意似



其爲人家與衛昌叔隣而不相往來平生所交惟元遺山而已

元盧壬博覽經史挺然有守薦爲襄城主簿以文學飾吏事聲價爲當道所推擢鄭州課官子天祥天祐天瑞並以文章著名天祥仕至閩海道提刑使天祐翊忠校尉行軍把總天瑞靖江縣尹

楊士宏字伯謙襄城人祖父俱臨江因家焉著有鑒池春草所著唐音十四卷采入四庫

明焦慶字大吉許人幼穎異不羣讀書入目不忘及



長寬平樂易內外如一四方知名文士多與交遊  
登天順明經進士授山東館陶縣丞尋署館陶縣  
事年餘養士愛民循聲特著監司交薦請實補縣  
令命未下會慶母有病力請解綬歸里終養以孝  
聞服闋數年不起築別墅琴書自娛著作如林以  
接引後學爲事比沒祇藏自娛集數卷及古書百餘冊而已至今談鄉賢者率首歸焉  
楊盛字道隆臨潁人強記洽聞無書不覽所積有  
詩數卷咸高古非人所及許守二泉邵君常輿迎  
至許與語古今事輒悅遂以許志託之



劉斯源字憲仲臨潁人著大學古今通考十二卷  
是書成於萬歷戊申首列朱子大學改本次列禮  
記古本次列魏石經本次列二程本而以宋元明  
諸儒說大學者附焉以諸說並陳無所去取故名  
通考采入四庫

王瓌字宗璽襄城人自幼凝重寡言十四入鄉校  
日記二千餘言登進士歷陞南戶部郎中以母老  
乞歸養瓌內剛外和居官恪恭廉慎俸祿外一毫  
不取於人既得請家居手不釋卷曰是秀才本不



能舍也所著有讀易鄙見三教不同大畧號愚菴  
學者羣稱爲退隱先生云子二錦鑾皆以才名顯  
王錦襄城人八歲能詩十歲通五經十六歲成進  
士授翰林庶吉士制勅詩賦揮筆立就同館號曰  
文虎當軸者忌其才出爲御史兩次代巡俱有聲  
轉副憲與同官不合卽拂衣歸時年二旬有八著  
述甚富有咏梅咏物等集行於世

孫濬號泗源天性孝友萊彩田荆不復過之六經  
子史而外靈典秘書靡不博洽好古文詞尤善詩



章四方從函丈者以千計逾壯而弗售恬如也明  
萬歷丙午七月始以明經薦至八月登賢書許士  
加額曰捷騎飛來滿道塵無人不頌泗源君關閩  
濂洛誰傳鉢不媿科名又有人

張蓋臣字元進長葛人天性穎異過目成誦九歲  
能文東里高鳳溪一見奇之稱爲破浪才弱冠遊  
泮與新鄭高存菴伯仲襄城姚文軒潁上邢後坡  
禹郡連嵩陽大梁曹少川同邑宋蘭臯爲友時號  
中原八俊嵩陽不祿爲撫其兩孤以女妻其長君



且受業焉已而相繼成進士其篤於交情生死弗  
渝也不事生產嘗却徽藩之聘文章氣節推重一  
時方伯內江高公令二子師事之時憲長太原李  
公少參江西余公子悉與焉已酉舉鄉試第一人  
直指知爲藩臬西席避嫌不果壬子列賢書及赴  
公車海內人譽如高文襄王荊石秦鳴雷輩無論  
識與不識莫不交歡時肅宗重元教一夕命下取  
對句百聯詞臣屬公筆頃刻立就內寓親賢遠奸  
以開太平景運等句分宜聞而惡之故屢上春官



不第以親老家貧就陽城令將之任高文襄送之  
曰君蘊經濟才願少待公正色曰輔臣當爲國薦  
賢不得私一故人抵陽城以節愛爲治頗著政聲  
甫一載疾作自嘆曰與其淮陽卧治孰若秋風命  
駕乎百姓遮留不得迄今尸祝焉卽歸蕭然三徑  
菽水承歡暇則徜徉詩酒而已生平著作甚富有  
羣書選粹兩漢博議詩文應酬集眞草書法行世  
年六十卒

耿震國字麗陽襄城人崇禎時舉賢良方正不就



幼隨兄華國師事高忠憲攀龍學有稟承流寇入  
中州震國與華國首貨巨萬家貲募練義勇抗拒  
邑人賴之又設策拯救餓夫全活不下千餘戶精  
詩古文瑰麗高邁無講學家迂腐氣華國著有蒙  
泉雜言論語正意周易解震國著山樵暇語富春  
軒文集子應蟠庠生應庚廩生著文峯齋集

國朝王贊鼎字憲燹先賢以旌第四子博雅淹貫若  
作如林詩古文辭楷草書法兼擅其妙自構茅屋  
半間蒔花藝草旦晚朗吟門以外不問也年近八



旬神骨強健屣棄名利云

張鑾字太阿襄城人家世以節義文章著聲少穎異六歲時口授論語尙書卽成誦年十三習舉子業博稽羣書嗜古大家之學尤善詩賦遍極諸體久之自成一家而守身養志出百死一生卒能保焉遭父喪哀毀骨立廬苦啜粥者三年母喪又哀毀如前本邑余令罷官寓劉氏西園立詩社推鑾爲詩豪日事著作吟咏之暇輒濡筆爲張顛草書以故四方學士丐詩求書者踵相接也子四皆名



登庠序以文行推重於士林云

李來章本名灼然以字行號禮山晚號寒香公襄城人康熙乙卯舉人倡明正學爲世名儒嘗與耿宮詹介冉翰林覲祖講學嵩陽書院世稱中州三君子又主南陽書院出仕爲粵東連山令值猺亂後力行撫字猺獐格心邑中大治行取授兵部武選司主事監督倉儲差滿告歸九卿以學行醇正薦被徵以疾辭流寓許州城南詩古文詞著作甚富子夢麟字滄雷以選貢爲溫縣教諭整躬率士



有蘇湖風範所著有拙修齋詩文集語錄行世來  
章崇祀鄉賢所著禮山園文集連陽八排風土記  
四庫入存目

萬邦榮字西田襄城人幼聰慧能文年十四遊庠  
肆力於學於書無不窺而尤嗜爲詩貫穿百氏自  
名一家湯太常視學中州見其詩異之延之署爲  
上客自是聲著當代名公巨卿爭欲識其面年四  
十八歲中康熙庚子舉人大中丞蔡公薦於朝授  
明史館纂修甲寅河東王督臺命修河南省志舉



博學鴻詞以明史館議叙授山東莘縣令有惠政  
歸之日莘民老幼唏噓相送於道所著有明史列  
傳省志紅崖草堂詩集若干卷行於世

劉青藜字太乙襄城人貌魁碩雙目炯然積學淵  
博能詩文康熙丙子以春秋第一人舉於鄉名達  
京師一時名公巨卿無不以得人爲快如王尙書  
士正宋尙書犖顧翰編圖河皆傾服其奇才遠邁  
前人致書訂交焉登進士授庶常留都下未半載  
數夢倚閭題其寓曰夢環齋蓋其母子相依至性



天生本於家傳純孝也遂得請養歸尋卒所著高陽山人詩文集金石錄若干卷行於世

耿埰字錫公襄城人少敏而嗜學弱冠以古名儒自期謝却世緣肄業山洞經史諸子百家無不博覽而潛心四書朱註研究義理十年出而應試以第一人入庠食餼屢試見賞於文衡一時名流服其才後生羣以得列門牆爲榮立教四十年凡經指授者爲文悉有理法成名幾二百人以歲貢秉鐸於睢陽七載所著有四書提耳大中講義行世



賈詮字釋之康熙時諸生闢精舍於駝嶺下雜植松菊辛夷竹梅之屬數千本以枳爲籬鍵關汲古不慕榮利晏如也長於吟咏多至千餘首直入王孟之室而躋其馭邑長張雲谷以爲在汜南諸子可推獨步河南藩憲數欲以茂才異等薦之未果著詩集岩居六種言襄山紀畧藏於家

劉青芝字芳草襄城人年五十餘始登進士改庶吉士長厚嗜學著學詩闕疑學禮質疑從兄青霞慎獨軒集與同縣常定遠刻五經圖并采入四庫



存目

李嵩齡字靜若性敏嗜學能文章名重一時登乾隆乙酉賢書家居教授生徒口講指畫務使其心開明而後已郡中知名之士多出其門

李櫜字壽庵舉人任睢州學正性謹恪寡言笑爲文真摯醇雅能獨出已見不爲前輩方家所囿所著有詩古文詞士人樂誦之

王然照字丹存增生副貢舉賢良方正麟度子也潛心性理研究經義著龍文鞭影一卷禮記義疏



鈔十卷曰與生徒講論務期心解力行不愧名教  
李雲翥字籛亭學古通經精於制義由舉人任白  
水知縣以文造士公餘著籛亭稿鐫焉

孫旼字雖若號玉峯聰穎敏達善屬文敦質行著  
思得錄四卷體驗深至掃絕依傍舉明經任宜陽  
訓導著振鐸正言一冊以剴拂生徒士習爲之曰  
上引疾告歸省墳墓修世譜以孝友睦婣型於家  
故其子弟皆恂恂有儒者風

孫世封字廣輿號森圃賦資俊穎能文章工詩律



著森圃韻語爲世名儒歷主許臨襄鄆山右平陽  
書院講席成就多人嗣以進士秉覃懷府鐸課士  
有法懷固才藪得先生而文風益蒸蒸日上年餘卒  
於官

李炳南字寅菴號懷嵩英敏過人幼從贈翁受讀  
日記數千百言早歲爲文疎宕有奇氣旣乃務於  
精醇說理宗新安而以金谿妙義參之著懷嵩堂  
稿詩古文集傳誦四方好遠遊不事家人生產雖  
屢空恬如也歷主舞泉鹿鳴平原書院出其門者



多知名士嗣以進士出宰浙江仙居有惠政邑人  
公書甘棠遺愛請懸於庭不受解組歸惟取圖書  
鐫板實囊橐焉子堯觀恩選奎觀食餽孫國琪登  
道光辛卯賢書世其家

文熙字際雍歲貢氣質端嚴沈潛書理著有大中  
講義

吳文豹歲貢豪邁英爽落落然不羈於俗能文章  
工詩律畧年食餽肄業大梁書院主講陳宮詹俾  
領袖諸生以爲木天清選拭目可俟也而豹竟以



文章憎命未獲一第乃寄情山水慷慨悲歌益肆力於詩以終其身著有芝山堂詩

劉鳳翰字苞九博古通經著周易質實傳誦四方楊如燿字映斗容貌穆如而中有深思好讀書過目輒成誦爲文義理精實根柢六經登乾隆壬午賢書第一秉太康鐸士大夫皆教禮之著有守拙堂文稿

慕甲榮字冠臚潛心經史留意訓詁爲文剖析理蘊精刻沈實以舉人秉鐸禹州著有述德堂塾課



行世

劉源生字含溥賦性孝友立品端方嗜學能文包  
牧曾以澹臺滅明相推許由拔貢中甲午科舉人  
任上蔡縣教諭既至日集諸生於講堂舉諸書作  
文之道諄諄訓迪不倦士咸以山斗重之解組歸  
閉戶著書刻有未信堂稿未信堂續稿行世姪海  
觀登丁酉賢書孫德紹食餽皆能繼其家學  
張月三字功捷拔貢品端學優著四書管見指授  
生徒悉本心得不規規於時下講義



王施綱字品彛生而穎異日誦數千百言應童子  
試不售遂絕意功名潛心理窟諸子百家無不詳  
究著有性理拾遺六卷吳陽詩草二卷物類緣始  
四卷

郝天祿字君錫童年遊泮試輒冠軍落拓自喜不  
事生人業屢戰棘闈數奇不售中歲抑鬱以卒士  
林惜之平生著作甚夥尤邃於詩有潁州詩草存  
於家



劉宋主

林部公亭主簿其詩文辭賦詩賦制草亦

事主人將與煙輒照其在公書中藏賦詩以卒士

職天通守既歸重平並將詩賦賦軍容吐自喜不

國宋主

宋主自世聖俞書六卷與謝詩草二卷賦詩辭賦

賦不與謝詩草及公書中藏賦詩以卒士

王獻之公書中藏賦詩以卒士







